

(Ref.: M. 275, S.L. 195. S. 42. B. 3/75.)

E noho ana i te whatitoka¹
O toku whare, o Te Pungarehu²:
Whakaanga³ tonu te kanohi ki te hihī o te ra.
Ka kai tonu mai ki taku kiri.
E te hautonga e pupuhi nei.
E wero ra ko i taku tinana.
E tama, tu ake ki runga ra!
Ko te kore weweru hei uhi iho mo te kiri ra
Ka pau te tikaro e aitua;
I huia⁴ ake nei aku turi ki poro kaki.
Me mihi kau atu, me tangi kau
Te ao e rere mai i Kapiti⁵, e Kau⁶!
E arohatia nei e au:
Aku mate tau tini.
Aku mate taurua ki te whare.
Moe hurihuri ai maua nei ko taku hoa.
E moe kino atu ra, e!

¹Whatitoka.—Ki etahi "te roro."

²Te Pungarehu.—Ki etahi "aitua," no nga whakawhitiwhitinga tena.
He whare i Te Putaru.

³Whakaanga, etc.—Ki etahi, "Whakamau te titiro ki te hihī o te ra."

⁴I huia ake, etc.—No nga whakawhitiwhitinga ka penecitia, "I huia mai nei nga mate ki a tatou."

⁵Kapiti.—Ko te motu i waho o Otaki.

⁶E Kau.—Mo Te Herekau.

86.—HE WAIATA TOHUNGA.

Na WAIKATO.

Na Te Taite Te Tomo i whakamarama.

I taia tenei waiata ki "Nga Moteatea" (M.126). Kei reira e kiia ana, "He tangi na Te Iro, no te hekenga i Matakītaki." Ko Matakītaki te parekura i mate ai a Waikato i a Hongi Hika. i a Nga-Puhi. Otira ko te ahua o te kaupapa o te waiata kaore i whakahua ki taua parekura. Ko te korero nui o tenei waiata mo te kimihanga a Hikātamure i te makutu.

Ko Hikātamure no Kawhia. he tipuna rangatira no Waikato. Ko ana uri ko Potatau, ko Te Rerenga, ko etahi atu. I haere ia ki te rawhiti ki te tiki makutu, hei takitaki i to ratau mate ko tona iwi i tenei tangata i a Kiki-whakamaroke—he tohunga makutu no Waikato. Ka haere mai na i Kawhia ka tae mai ki Omawete, kei Taupo, ka kiia atu e Ira-hangore (he tohunga no Taupo) kia ahu ki te rawhiti, ka haere na ia. Ka tae ki Motutere ka whai-kupu mai a Ngahina, kia haere tonu. Tae atu ki Opepe na Maihi te kupu. "Ka pa ano e koe, a kia eke ki runga o Titiokura. me kore koe e rongō i te ha o te tai-rawhiti." Haere tonu na, ka tae ki Tatara-a-kina, ka whai-kupu mai a Te Rangihiroa "Nau mai e noho, kei te marubi te rangi." Ka utua e ia: "E pai ana, ehara he kohihi Maungaharuru."

Ka tae ki Te Kahawari i Nukutaurua. ko Taunga-ki-te-marangai te tohunga, kaore i riro mai te makutu, kua kore tonu.